

Iloqarfinni nunaqarfinnilu, immap tinittarnera ulerujussuarterneralu pillugit, angallatinut umiarsuarnullu talittarfiit qarsunneqartaleriartuinnarneri, isumannaannerusumik aaqqissuunneqarnissaat siunertaralugu, UKA2021-mut naammassereersimasussamik Naalakkersuisut pilersaarudioqqullugit peqquneqarnissaannik Inatsisartut aalajangiiffigisassaattut siunnersuut.
(Inatsisartunut ilaasorta q Siverth K. Heilmann, Atassut)

Akissuteqaat

(Ineqarnermut Attaveqaqatigiinnermullu Naalakkersuisoq)

Siullermeerneqarnera

Aallarniutigalugu Naalakkersuisuniit aalajangiiffigisassatut siunnersuummut qujavunga.

Aallaqqaasiutigalugu oqaatigissavara, ”umiarsualivinnut Immikkoortumut pilersaarut 2017-2027” siornatigut akuersissutigineqartoq naapertorlugu Naalakkersuisut Nunatsinni umiarsualivinnik ingerlatsimmata. Immikkoortumut pilersaarut umiarsualivinnik atortuinillu nalunaarsuinernik, aserfaallatsaaliuinernik nutarterinernillu pilersaarutininik imaqarpoq.

Taamaalilluni umiarsualivinnik ataavartumik nalunaarsuinnermut, aserfallatsaaliuinnermut nutarterinernullu atatillugu, Atassummit ujartorneqartoq ataavartumik ingerlanneqartareermat.

Tamatuma ukkatarinissaata pingaaruteqassusianut Naalakkersuisut isumaqataallutik, suliap attatiinnerneqarnissaa sulissutigissavaat.

Taakku oqaatigeriarlugit Naalakkersuisut erseqqissaatigerusuppaat, umiarsualivinnut talittarfinnullu aningaasaliissutinik inisseeqqinnissamut ukiumut 25,2 mio. koruuniinnaat immikkoortinneqartarmata. Nutarterinerit piorsaanerillu saniatigut puttasut qaqinneqartarnerini aqqarneqartarnerinilu ingerlatsinermi aningaasartuutit kontomit tassannga aamma matussuserneqartarput, soorluttaaq umiarsualivinni tassanngaannartumik suliarineqartariaqarlutik ajoqusernerit suliarineqartarneri kontomit tassannga matussuserneqartartut.

Piviusunngortitsillunili suliniarneq, umiarsualivinnut qitiusumik oqartussaanerup killiliussaata iluanit ingerlanneqarpoq. Tassunga ilassutitut Naalakkersuisut eqqaasitsissutigissavaat, massakkut aningaasaqarnikkut inissisimanerup kingunerisaanik suliasamat killiliussat iluini suliarineqareersinnaasumut, immikkut aningaasaliissutissanik qinnuteqarnissaq aningaasassaqartinneqanngimmat. Naak, aamma siunnersuut siunnersuutisialaagaluartoq.

Taamatut nassuiaareernikkut Naalakkersuisut innersuusutigaat, siunnersuut itigartitsissutigineqassasoq.

Taamaalilluni aalajangiiffigisassatut siunnersuut Inatsisartunit kajumittumik suliarineqarnissaanut ingerlateqqippara.